

卷九

書名 佛祖歷代通載二十二卷 慶長十七年本國寺活字印本
 撰者 元 釋念常 撰
 卷九
 內容分類 子 釋家 史傳
 索書號 貴重 62
 編號 C6553700

佛祖歷代通載卷第一

嘉興路大中祥符禪寺住持華亭念常集

七佛偈

毗盧尸佛過去莊嚴劫第九十八尊偈曰身從無相中受生

猶如幻出諸形像幻入心識本來無罪福皆空無

所住長阿含經云人壽八萬歲時此佛出世種刹

利若父槃頭母槃頭婆提居槃頭婆提城

坐羅樹下說法三會度人三十四萬八千人神

足名騫荼二名提舍侍者無憂子方膺

莊嚴劫第九尊偈曰起諸善法本是幻造諸

彩色首頁1

東洋文化研究所漢籍目錄 編號: C6553700

東洋文化研究所漢籍目錄所藏漢籍善本全文影像資料庫 索書號: 貴重 62

漢籍善本全文影像資料庫文本佛祖歷代通載二十二卷 慶長十七年本國寺活字印本

版權所有: 東京大學 東洋文化研究所

使用上的注意事項



吳郡步顯鄉刊

所究研京東院學化文方東

No. 154 七



不 許 複 製

NOT TO BE REPRODUCED

東京大学東洋文化研究所

佛祖歷代通載卷第九

嘉興路大中祥符禪寺住持華亭念常集

京



壬午

高祖武皇帝衍改天監

字升達南蘭陵都里人與齊同出亦漢相何二十四

梁

姓蕭氏四主都建康

○雷氏云

高太世敬梁朝四主五十七年

代孫父順之為丹陽尹母曰張氏生帝狀兒奇偉日角龍顏項有圓光身不映日受齊禪後酷好佛法降將侯景反叛率兵圍帝于臺城斷食而崩于淨居殿壽八十六在位四十八年○或問曰梁武帝終身奉佛然困浮于臺城佛法之驗其在何也答之曰有是疑乎有是謂也且夫人之性命業性定焉苟往世之業會矣豈今生之善華哉故文中子曰齋戒修而梁國危非釋迦之罪也緣紆齊廢帝之德值侯景臺城之困業理既昭或疑遣矣

○道家太清經及衆醮儀十卷乃梁時陶弘景安

造出殊

癸未

武帝詔曰大士寶誌迹拘塵垢神游冥寂水火不能焦濡蛇虎不能侵懼語其佛理則聲聞以上談其隱淪則遁仙高者豈可以俗法常情空相疑忌自今中外任便宜化帝一日問誌曰弟子煩惑未除何以治之答曰十二帝問其旨云何答曰在書字時節刻漏中帝益不曉他日更問國祚有留難否誌指其頸示之帝曰朕享國幾何答曰元嘉元嘉帝喜以為倍宋文之年時革命之初帝臨政刻急誌假帝神力令見先君受極苦於地下由是卹

僧繇
寫真
不定

刑嘗詔畫工張僧繇寫誌像僧繇下筆輒不自定既而以指釐面門分披出十二面觀音妙相殊麗或慈或威僧繇竟不能寫他日與帝臨江縱望有物泝流而上誌以杖引之隨杖而至乃紫旛檀也即以屬供奉官俞紹雕誌像頃刻而成神采如生帝悅以安內庭時法雲雲光二師俱有重望每講法天輒雨華帝疑其證聖夜於便殿焚疏請誌偕光雲三大士齋翌日誌獨赴而光雲俱未知帝由是益異其禮又嘗與帝登鍾山之定林寺指前獨龍岡阜曰此為陰宅則永其後帝曰誰當得之曰

郝氏
夫人

先行者得之至十三年大士示寂帝憶其言以金二十萬易其地建浮圖五級其上鎮以無價寶珠勅王筠勒碑葬日車駕親臨致奠大士忽現於雲間萬眾惟呼聲震山谷自是道俗奉祀竒瑞顯應爲天下第一凡大士所爲秘識偈句多著南史爲學者述大乘贊十篇科誦十四篇并十二時歌皆暢道幽致其旨與宗門冥合今盛傳于世是歲帝妃郝氏者初生有赤光照室噐皿盡明及長性明惠善隸書讀史傳女工之事靡不閑習宋齊間諸王求婚父曄皆不許後以適帝生三女帝

爲雍州刺史而妃薨其性酷妬及是化爲巨蟒入于後宮通夢於帝帝躡將不安蟒輒激水騰涌或現龍形光彩照灼因於露并上爲殿衣服委積置銀轆轤金瓶灌百味以祀之帝畢世不復議立皇右云

甲申

天監三年四月八日帝率道俗二萬餘人升重雲殿親製文發願乞憑佛力永棄道教不在崇奉略曰經云發菩提心者即是佛心一切散善不得爲喻弟子蕭衍比經荒逆耽事老君累業相承染此邪法今捨棄奮習歸伏正因願使未來世童男出

舍邪
歸正
發願

家廣弘經教化度含識共證菩提寧在正法中長
淪惡道不樂歸依老子暫得神仙陟大乘心求離
邪見正願諸佛證明菩薩攝受弟子蕭衍和南

十一日勅門下曰大經中說九十六種唯一佛道
是其正道餘皆邪也朕捨道以事諸佛正內之道
公鄉能入此誓者各可發菩提心老君周公孔子
等雖是如來弟子化迹既邪止是世間之善不能

革凡成聖

具載如弘明集

是歲詔隱士何點點以巾褐入見帝帝賜之酒特
除待中點前席將帝須曰乃欲臣老子耶固辭不

受復詔何胤胤謂使者曰吾年五十七矣月食四
斗米不盡那復有宦情耶帝知不可致有旨給白
衣尚書祿胤苦辭晚入虎丘之西寺講維摩經及
將終憂天女六十餘人列于前及寤猶見之如故
即具浴儼衣冠少頃而卒何氏自晉司徒克宋同
徒尚之並建大義申明佛法累業傳承至胤姪侍
中敬容而止

丙戌

五年帝注大品臣僚命法師法雲講之雲辭疾不
赴帝遣使強起之曰將鼻流通非高德無以憑也
雲始從之雲最有譽當世雅為昭明太子所敬儒

釋兩優為天下第一

魏改永平

戊子

已丑

魏專尚釋氏不事經籍

八年魏主於式乾殿為諸僧及朝臣講維摩詰經時魏朝專尚釋氏不事經籍中書侍郎裴延雋上疏以為漢光武魏武帝雖在戎馬間未嘗廢書先帝行師還都手不釋卷良以學問多益不可輟故也陛下升法座親講大覺凡在瞻聽塵蔽俱開然五經治世之楷模應務之所先伏願經書互覽孔釋兼存則內外俱周真俗斯暢時洛陽中國沙門之外自西域來者三千餘人魏主別立永明寺千

餘間以處之遠近承風無不事佛比及延昌州郡凡一萬三千餘寺僧至二百萬

辛卯

十年詔法師僧旻入慧輪殿講勝鬘經帝臨聽公鄉畢集有旨於莊嚴寺建八座法輪妙選奇傑番次主之時以旻為第一當講日聽者傾都堂無容足名士劉葉嘗謂旻曰法師佛學有餘何故弘義多伸儒旨旻曰昔生公以頓悟通經次公以毗曇發論若貧道初不以儒釋限但據文義所向耳沙門道超者頻年力學慕旻公之講誓欲齊之夜夢神告之曰旻公毗婆尸佛時預宣法化君新發意

者何能類之第自求成名不必苟齊也是性謙冲
不恃能矜物一時公鄉道俗咸推仰之

壬辰

魏改延昌

十一年有旨命寶亮法師撰涅槃義疏帝爲之序
略曰離文字以設教忘心相以通道欲使珉玉異
價涇渭分流制六師而正四倒返八邪而歸一味
則法雨降而焦種受榮慧日昇而長夜蒙曉發迦
葉之悱憤吐真實之誠言雖復三施等於前五大
陳於後三十四問參差異辯方便勸發各隨意答
舉要論經不出兩途佛性開其有本之源涅槃明

癸巳

其歸極之旨非因非果不起不作義高萬善事絕
百非空空不能測其實際玄玄不能窮其妙門自
非德均平等心合無生則金墻玉室豈易入哉
下詔曰夫宗廟犧牲修行佛戒蔬食斷肉省貪絕
欲天下水陸不令蒐捕又勅太醫不使肉藥公家
織官錦帛並斷又造斷酒肉文及著淨業賦

甲午

天監十三年誌公和尚示寂

是年特進沈約卒約字休文婺州東陽人左目重
瞳腰有紫誌少爲書生名聞一時以風流見稱而
肌體清癯時謂沈郎瘦甚爲武帝所重官業具南

論中食

史嘗出意撰聲律以革古詩後世取則號曰四聲
約甚精佛理著中食論理趣甚高其略曰人所以
不得道者由於心神昏惑心神所以昏惑由於外
物擾之擾之大者其事有三一則勢利榮名二則
妖妍靡曼三則甘旨肥醲榮名雖日用於心要無
畧刻之累妖妍靡曼方之已深甘旨肥醲爲累甚
切萬事紜紜皆三者之枝葉耳聖人知不斷此三
事求道無從可得乃爲之法使簡而易從若也直
云三事惑本並宜禁絕而此三事是人情所甚惑
念慮所難遣雖有禁之之旨而事難卒從譬如方

舟濟河豈不欲直至彼岸河流湍急會無直濟之
理不得不從流靡久而獲至非不願速事難故也
禁此三事事宜有端何則食之於人不可頓息其
於情性三累莫甚故推此晚食併置中前自中之
後清虛無事因此無事念慮得簡在始未專在久
自習於是束以八支紆以禁戒靡曼之欲無由得
前榮名衆累稍隨事遣故云往古諸佛過中不食
此蓋是遣累之筌弔適道之捷徑而惑者咸謂止
於不食此乃迷於向方不知厥路者也又嘗著設
會論意謂如來在日衆居伽藍不置食具時至則

過中不食

行乞
事廢
僧非
佛種

分衛持鉢以福衆生今之僧徒一皆違廢不止不
持中食甚者甘腴厨饌豐美飲食或遇請召得蔬
藪之具莫不顰蹙以為不能甘也此豈有志於道
哉其論略曰出家之人本資行乞戒律炳然不許
立厨帳并蓄淨人今既取足官寺行乞事廢或有
持鉢登門便呼為僧徒鄙事既為衆所鄙耻不復
行乞悠悠後進求理者寡將謂乞食之業不可復
行由淨飯王子轉輪之貴持鉢行乞以福施者豈
不及千載之外允庸沙門躬命僕豎自營口腹者
乎行乞受請二事不殊今不復行乞又不赴請則

乙未

行乞之法於此永冥此法既冥則僧非佛種佛種
既離則三寶墜地矣約有文集百餘卷行于世
是年魏胡太后作永寧石窟二寺極土木之羨而
永寧尤盛有金像高丈八尺如中人者又十軀為
浮圖九級築基下及黃泉其高九十丈上立剎復
高十丈每夜靜鈴鐸聲聞十餘里佛殿如太極殿
三門如端門僧房千楹玉珠錦綉駭人心目未幾
雷電火爇其塔遠近咸見烟焰中有塔升空而沒
後月餘有自東州來者云此日見塔乘空飛海上
而望海者時亦見之

丙申

魏孝明帝詡

宣武次子，六歲即位，胡太后臨朝，在位十二年，十九歲崩。

葬定陵，改熙平。

魏改神龜

戊戌
己亥

會稽沙門慧皎以寶唱所撰名僧傳頗多浮汎因著高僧傳十四卷始元漢永平十年終于是歲凡四百五十三載二百五十有七人附見者二百餘人開其德業大略為十例其自叙曰前古撰集多曰名僧然名者實之賓也若實行潛光則高而不名若寡德適時則名而不高茲焉用紀高而不名則備今錄世以為確論

猴馴側舟自泝而上

釋僧朗者常誦法華風度凝遠飲啗不常每出一狗一猴隨之日循乞得飲膳即置木盂中食畢舉其餘以飼猴狗善作龜藏或時手足頭頸俱縮不見又嘗登舟初無篙力朗坐其中猴狗馴側舟自泝澆而上

法師道英初隱太行山禪宴樹枝縈結如蓋覆之居久之棄去行龍臺澤觀游魚愛之即解衣入水宴坐深淵七日而出又嘗隆冬觀嚴冰愛其瑩澈就卧其上信宿而起晚居蒲州普濟寺一日講起信至真如門奄尔氣絕衆意其逝矣有都講識之

入滅
盡想
庚子

即謂衆曰此入滅盡想耳三日乃甦矣

改普通○魏改正光

帝受
歸戒

普通元年帝於禁中築圓壇將稟受歸戒妙選德行尤異者爲之師朝議以慧約法師望高詔至約以禮遜讓不許夏四月丁巳帝行問道禮稟約爲師授具足戒方羯磨次甘露降于庭有三足鳥二孔雀歷階馴伏帝大悅賜約別號智者自是入朝必設特榻處之而帝座其側凡太子諸王公鄉道俗從約授戒者四萬八千人沙門雖在耆艾亦重稟授獨法雲公曰吾旣戒矣其可以佛法爲人事

耶於是議者高之

入水
觀

時有達禪師者得水觀三昧每入此定有窺之者唯見清水凝滄蒲室沙門道儂從達遊得火光三昧所居之室玄夜大明焉

帝留神法門時釋子多縱率主僧懦不能制帝患之欲自以律行僧正事詔下京城大德無敢議者獨藏法師以爲佛法淵博非一人能盡之執不奉詔帝訝之召入光華殿問狀藏面陳大旨秉執有據帝不能奪遂從之藏退謂諸僧曰上以佛法爲已任誠當推順然衣冠家子弟十輩猶不能俱稱

藏登
御座

父意今糶雜五方之衆而以一已好惡繩之戒律將廢矣諸君不慮此何也法雲公歎曰教理深致未能多謝一日之事良可愧服

帝自受具寢處略同沙門雖宮禁每亦恣僧游覽獨禁御座而已藏公一日昇殿登之左右呵止之藏曰貧道定光金輪之裔寧愧此座倘見殺不慮無受生處帝聞置之弗罪藏少時遇相者曰法師壽不過三十一歲藏懼日誦金剛般若至期夢前人復來告曰法師以般若力故壽倍增矣又嘗夢維摩詰降其房與語臨別以素塵尾遺之而去藏

魏評
釋道

自是玄辯日新矣魏正光元年孝明帝加元服命沙門道士講道於禁中時道士姜斌沙門曇謨最對論帝曰佛與老子同時否姜斌曰按開天經云老子西入化胡佛克侍者明是同時曇謨最曰老子當周何年而生斌曰定王三年生簡王四年仕於周敬王四年年八十五西入化胡最曰吾佛以周昭王二十四年誕生穆王五十二年滅度自世尊滅度至定王三年凡三百四十五年老子方生及敬王元年老子西游則世尊示寂已四百二十五年矣據此相去懸遠而言化胡無乃謬乎斌曰

佛生周昭之世有何文記最曰周書異記漢法本
內傳並有明文斌曰孔子制法於佛迫無文記何
也最曰孔子有三備卜經謂天地人也佛之文言
出於中備斌曰孔子聖人何假卜乎最曰佛是衆
聖之尊達一切含識先後際吉凶終始不假卜筮
自餘小聖雖曉未然必籍著龜方通休咎時侍中
劉騰宣勅曰姜斌論無宗旨宜退席又問開天經
何從而得是誰所說可疾取來及取經至帝命群
臣詳定真偽時太尉蕭綜太傅李寔洎公鄉士夫
百六十餘人覽畢劾奏曰老子止著五千文更無

他說今姜斌所據文詞鄙俚宗旨乖謬既瀆先師
又罔聖聽罪當惑衆制可將抵以刑三藏菩提流
支奏解斌特流馬邑曇謨最善大小乘有律行初
在邯鄲說律感異比丘六十餘輩降席聽戒流支
每見稱為東方開士焉

魏書
佛老志

魏書佛老志曰道家之源出於老子其自言也先
天地生以資萬類上處玉京為神王之宗下在紫
微為飛仙之主千變萬化有德不德隨機應物厥
迹無常授軒轅於我崑教帝嚳於牧德木禹聞長
生之訣尹喜受道德之旨至於丹書紫字升玄飛

步之經玉石金光妙有靈洞之說不可勝紀其爲教也咸蠲去邪累澡雪精神積行樹功累德增善乃至白日升天長生世上是以秦皇漢武甘心不息勞心竭思所在追求終莫之致退恨於後故有樂大徐氏之誅然其道惑人効學非一靈帝置華蓋於濯龍設壇場而爲禮及張陵授道於鶴鳴因傳天宮章本千有二百弟子相授其事大行齋祠跪拜各有成法於是三元九府百二十宮一切諸神咸所統攝又稱劫數頗竊佛經及其劫終稱天地俱壞其書多有禁秘非其徒不得輒觀至於化

金銷玉行苻勒水奇方妙術萬等千條上云羽化飛天次稱消灾減禍故好異者往往而尊事之初文帝入賓于晉從者云登僊伊闕太祖好老子之言誦詠不倦天興中儀曹郎董謚上服食仙經數十篇乃置仙人博士立仙坊煑煉百藥封西山以供其薪蒸令死罪者服之多死無驗久之太祖意少懈乃止

魏用正光曆

鑄鐵錢民盜鑄者多物價騰踊

魏改孝昌

壬寅

癸卯

乙巳

丁未改大通上幸同泰寺捨身

初祖菩提達磨大師天竺南印度國香至王第三子也王薨師出家遇二十七祖般若多羅付以大法因問我既得法宜化何國多羅曰汝得法已俟吾滅度六十餘年當往震旦國闡化曰彼有法器堪繼吾宗千載之下有留難否多羅曰汝所化方得菩提者不可勝數吾滅度後彼有劫難水中文布善自降之汝至時南方不可久留聽吾偈曰路行跨水復逢羊獨自悽悽暗度江日下可怜雙象馬二株嫩桂久昌昌復演八偈皆預爲識至多羅

示寂師演化本國會其姪異見王者輕毀三寶師遣其徒波羅提微現神力攝化歸正師以震旦緣熟即別其衆而異見王枉駕見師因告之曰當勤修福行護持三寶吾去非晚一九即回王泣曰寂既有緣在彼非吾所留唯願不忘父母之國事畢早迴遂具大舟實以衆寶王躬率臣僚送至海濱師同商馭舟達于南海廣州刺史蕭昂謁之以表聞奏有詔迎見師入朝帝問朕即位以來造寺寫經度僧不可勝數有何功德師曰並無功德帝曰何以並無師曰人天小果有漏之因雖有非實帝

達磨
見梁

曰何謂真功德師曰淨智妙明躰自空寂如是功德不於世求帝曰何為聖諦第一義曰廓然無聖帝曰對朕者誰曰不識帝不省玄旨師遂留數日遂度江之魏止於嵩山少林寺終日壁觀而已有僧神光者因神人發起來見師師端坐不顧會天大雪光立雪中至積雪過膝師憫而問曰汝久立雪中求何事耶光曰唯願大慈開甘露門廣度群品師曰諸佛無上妙道曠劫難逢豈小德小智輕心慢心欲冀真乘徒勞動苦光聞誨勵喜不自勝即以利刀自斷左臂置於師前師曰諸佛寂初求

一祖
悟心
機緣

杭州五雲和尚坐禪
歲畧曰隨宜合開
身禪觀 本註蓮
大師正付法服外委
示初梳心之要啓
四門四行進事也
又正宗記才五蓮
傳曰或曰續僧傳以
壁觀波羅門者
蓋出於流俗之語也
四行之說豈非
磨道之極耶

道重法忘身汝今斷臂吾前求亦可矣光承其言即易名慧可復問曰諸佛法印可得聞乎師曰諸佛法印匪從人得曰我心未寧乞師與安師曰將心來與汝安可曰覓心了不可得師曰與汝安心竟父之為可等略辨大乘入道四行其辭曰夫入道多塗要而言之不出二種一理入二行入理入者謂藉教悟宗深信含生同一真性但為客塵妄想所覆不能顯了若捨妄歸真凝住壁觀無自無他凡聖一等堅住不移更不隨於文教此則與理冥符無有分別寂然無為名之理入行入者

有四一報冤行二隨緣行三無所求行四稱法行
謂報冤行者凡修道人若受苦時當念我從往昔
無數劫中棄本逐末流浪諸有多起冤憎違害無
限今雖無犯是我夙殃惡業果熟非天非人所能
見與甘心忍受都無怨恨作是觀時與理相應躰
冤進道故名報冤行隨緣行者衆生無我並緣業
所轉苦樂齊受皆從緣生若得勝報榮譽等事皆
是過去夙因所感緣盡還無何喜之有得失從緣
心無增減喜風不動冥順於道名隨緣行無所求
行者世人長迷處處貪著智者悟真安心無爲萬

有皆空無所希冀三界久居猶如火宅有身皆苦
誰得而安了達此處息念無求故經云有求皆苦
無求乃樂是則無求真為道行故名無所求行稱
法行者性淨之理因之爲法此理衆相斯空無染
無著無此無彼經云法無有我離我垢故智者信
解此理應當稱法而行法體無慳於身命財行檀
捨施心無慳惜達解三空不倚不著但爲無垢稱
化衆生而不取相此爲自行亦復利人莊嚴菩提
之道檀施旣爾餘五亦然爲除妄想修行六度而
無所行是名稱法行

祖分
皮肉
骨髓

大同元年十月師將示寂道副尼總持道育慧可
等待側曰時將至矣汝等盍各言所得乎時道副
曰如我所見不執文字不離文字而為道用師曰
汝得吾肉皮尼總持曰我今所見如慶喜見阿闍佛
國一見更不再見師曰汝得吾皮肉道育禪師曰四
大本空五陰非有而我見處無一法可得師曰汝
得吾骨大師惠可即禮三拜後依位而立師曰汝
得吾髓即顧謂可曰世尊以正法眼藏付囑木迦
葉展轉傳授以至於吾吾今付汝汝當護持并授
汝袈裟以為法信可跪受其衣願聞指示師曰內

傳法印以契真心外付法衣以定宗旨後代澆薄
疑慮競生謂吾西土汝乃此方憑何得法以何為
證或遇難緣但出此衣用以表信其化無礙至吾
滅後二百餘年衣止不傳法周沙界潛符密契千
萬有餘汝當闡化勿輕未悟一念迴機便同本有
聽吾偈曰吾本來茲土傳法救迷情一華開五葉
結果自然成又曰吾有楞伽經四卷亦付與汝即
是如來心地要門吾自離南印來此東土見赤縣
神州有大乘氣象遂逾海越漠為法求人際會未
諧如愚若訥今得汝傳授吾意已終乃與其徒往

二百餘年
無餘字
別錄

禹門千聖寺有期城太守楊銜之問曰西天五印師承爲祖其道云何師曰明佛心宗行解相應名之曰祖銜之曰弟子素奉三寶而智慧昏蒙願師慈悲開示宗旨師以偈答之曰不觀惡而生嫌不觀善而勤措不捨智而近愚不拋迷而就悟達大道兮過量明佛心兮出度不與凡聖同躔超然名之曰祖銜之聞偈乃稽首曰願師慈忍久住世間師曰吾化緣已畢傳法得人吾即逝矣是日端坐而寂門人奉全身葬熊耳山定林寺明年魏使宋雲西域迴遇師于葱嶺手携隻履翩翩獨邁雲問師今何往曰西天去及雲歸朝具言其事門人啓壙唯空棺隻履存焉梁武帝聞師顯化始未如此遂親撰碑刻石于鍾山

論曰昔嵩明教著傳法正宗記稱達磨住世凡數百年諒其已登聖果得意生身非分段生死所拘及來此土示終葬畢乃復全身以歸則其住壽固不可以世情測也傳燈錄云師以九月二十一日至廣州刺史以表聞奏帝遣使賞詔迎之師以十月一日至金陵然自廣至金陵亡慮三千餘里將命者往而復師方啓行豈以十

日之間能歷三千里乎。又謂魏孝明帝欽師異迹三屈詔命師竟不下少林。及師示寂宋雲自西域還遇師于葱嶺。孝莊帝有旨令啓壙如南史普通八年即大通元年也。孝明以是歲四月癸丑殂。師以十月至梁。蓋師未至魏時孝明已去世。及其子即位未幾爲爾朱榮所弒。乃立孝莊帝。由是魏國大亂。越三年而孝莊殂。又五年而分割爲東西魏。然則吾祖在少林時正值其亂。及宋雲之還。則孝莊去世亦五六年。其國至於分割久矣。烏有孝莊令啓壙之說乎。舊唐史

云後魏末有僧達磨航海而來。旣率其年。魏使宋雲於葱嶺回見之。門徒發其墓。但有隻履而已。此乃實錄也。又謂光統律師菩提流支數下毒害師。師遂不救。嗚呼甚哉。光統流支法門龍象。詎能爾乎。是皆立言者悞也。雖然吾宗從上來事昭昭若揭。日月而行。故二祖禮三拜後。依位而立。當爾之際。印塵劫於瞬息。洞刹海於毫端。直下承當。全身負荷。正所謂通玄峯頂。不是人間。入此門來。不存知解者也。抑焉有動靜去來。彼此時分而可辯哉。

戊申

魏莊帝子攸

獻文之孫彭城王第三子是年二月、孝明為胡太后鸞之

時尔朱榮立帝即位二年改元建義、永安二號後復欲篡逆求九錫九月入朝帝知召榮手殺之其弟尔朱兆率兵向洛、立東海王暉、改元建明十二月殺子攸、空宮百日、兆又以暉疎遠殺之、而更立孝文之姪廣陵王恭、是為節閔帝

已酉 改中大通

庚戌 九月上幸同泰寺舍身群臣以錢一億萬奉贖迴宮

辛亥 十月上幸同泰寺升座講涅槃經十一月講般若

經是年四月昭明太子薨太子諱統字維摩天監元年生於霸府三日而建康平識者以為天命所集幼聰睿三歲受孝經論語五歲徧讀五經悉能

諷誦八歲於壽光殿講孝經名儒重臣畢集座側太子詞吐華暢淵源無滯皆欽服以為聖童年十二於內省決獄剖斷平允自是數使聽訟賴活者不可勝數性慈孝美容止讀書數行俱下過目憶誦無違帝既留心內典躬自講說太子亦天性好佛凡釋部經論披覽略徧於東宮別立慧義殿專為法集之所招引名僧撰次法事儀注及立三諦等義世咨羨之母薨每哭輒動絕水漿不入口帝勅左右宣旨曰毀不滅性聖人所制不勝哀比於不孝有我在那得自毀如此即可強進飲粥太子

製 複 許 不

NOT TO BE REPRODUCED

昭明太子
感疾

劉勰
願乎

奉旨始進粥體素肥腰帶十圍至是減削過半帝
尋委以軍國政事太子處決無留滯引納天下奇
材賞愛無倦東宮有書凡三萬餘卷群賢畢集文
雅之盛由晉已來未之有也嘗游後池乘綵文舸
摘芙蓉以嬉姬人蕩舟沒溺而出感疾動股恐貽
帝憂不以聞遂薨天下哭之如喪其親焉
劉勰者名士也雅為太子所重撰文心雕龍五十
篇家貧不婚娶依沙門僧裕遂博通經論區別部
類而為之序定林寺藏經即其銓次也中書令沈
約絕重其文常置几按間凡都下寺塔及名僧碑

碣皆出其手累官通事舍人表求出家先燔須自
誓帝嘉之賜法名慧地

安定王朗改中興十月高歡起兵信都討
尔朱氏乃奉太武玄孫

朗行至苦山既平尔朱氏以朗踈遠又
以恭英毅難制乃幽之假安定王詔奉
孝文之孫
修即位

節閔帝恭改普泰是年安定王節閔
帝皆為高歡所殺

右魏自太祖登國丙戌九十二主百四十
九年至梁中大通而分東西

魏焉

壬子

西魏孝武修改永熙字孝則孝文之孫廣
平武穆主懷之子高
歡廢節閔而立帝歡有不臣之跡帝欲除
之歡覺率兵內發帝恐奔長安依閔西大



睚
况于

以護養衆生勝殘去殺普令百姓皆稟六齋今聞
皇帝崇法欲申論義未遂襟懷故遣弟子傅睚告
白睚投書太樂令何昌昌曰約法師猶置啓翁是
國民又非長老殊無謙卑豈敢進達睚燒手御路
昌乃馳往同泰寺詢皓法師勸速呈二月十一日
進書帝覽之遽遣詔迎既至帝問曰從來師事何
人荅曰從無所從來無所來師事亦尔昭明太子
問大士何不論義荅曰菩薩所說非長非短非廣
非狹非有邊非無邊如如正理復有何言帝曰何
爲真諦荅曰息而不滅帝曰息而不滅此則有色

有色故鈍如此則居士未免流俗荅曰臨財無苟
得臨難無苟免帝曰居士大識禮荅曰一切諸法
不有不無大千世界所有色像莫不皆空百川鼓
注不過於海無量妙法不出真如如來何故於三
界九十六道中獨超其最視一切衆生有若赤子
天下非道不安非禮不樂帝默然大士辭退異日
帝於壽光殿講金剛經聖師云大士能耳帝即召
大士大士對帝執拍板講經唱成四十九頌遂還
雙林至陳太建元年四月將示寂謂其徒曰此身
甚可厭惡衆苦所集要在護持三業精勤六度若

墮地獄卒難得脫常須懺悔又曰吾滅已不得移
寢牀七日當有法猛上人持像及鐘來鎮于此弟
子問既歸寂後形骸如何曰山頂焚之問若不遂
復何如曰勿用棺斂但累篋為壇移尸於上屏風
周繞絳紗覆之上建浮圖隨意安立又問諸佛滅
度時皆說功德師之發迹可得聞乎曰我從第四
天來為度汝等次補釋迦故大品云有菩薩從兜
率天來諸根猛利疾與般若相應即吾身是也言
訖加趺而逝壽七十有三至七日上人法猛果持
織成彌勒像及九乳鐘來鎮龕所須更不見大士

心王
銘

道具十餘事晉天福中錢王發塔取靈骨十有六
片皆紫金色并道具就府城南建龍華寺塑像安
置大士嘗著心王銘一篇其辭曰

觀心空王玄妙難測無名無相大有神力能滅千
灾成就萬德躰性雖空能施法則觀之無形呼之
有聲為大法將心戒傳經水中益味色裏膠青決
定是有不見其形心王亦爾身內居停面門出入
應物隨情自在無礙所作皆成了本識心識心見
佛是心是佛是佛是心心念念佛心念佛欲得
早成戒心自律淨律淨心心即是佛除此心王更





往彼傳寫歸建康流布江表唐貞元中金陵沙門
慧炬將此祖偈往曹溪同西天勝持三藏重共參
校并唐初以來傳法宗師機緣集成寶林傳光化
中華嶽玄偉禪師集真元以來出世宗師機緣將
此祖偈作其基緒編為聖胄集開平南嶽三生藏
惟勁頭陀又錄光化以後出世宗匠機緣亦以祖
偈為由集成續寶林傳宋景德中吳僧道原集傳
燈錄進于真宗勅翰林學士楊億工部員外李淮
太常丞王曙同議校勘具奏詔作序編入大藏頒
行天聖中附馬都尉李遵勗參石門聰禪師發明
因緣聚禪學僧列此祖偈世系事緣成廣燈錄上
仁宗御製序文勅入大藏流通建中靖國元年沙
門惟白將此祖偈以為標本成續燈錄進上云
他宗不知其原謂七佛偈無譯寡聞淺識一至妄
謬良可笑也

時隱士阮孝緒陳留人也家世仕宦父彥大尉從
事中郎孝緒年十三通五經大旨十六丁家難終
喪入鍾山聽講久之母有疾緒在席心驚而歸合
藥須生人參躬入鍾山採求未獲忽一鹿在前心
異之至鹿息處果得人參藥成母疾得愈齊尚書

令王晏來候之。緒惡其人，穿籬而遁。及晏被誅，以非黨獲免。嘗以鹿林爲精舍，環以林池，杜絕交游。世罕得而見之。御史中丞任昉欲訪焉，而不敢進。乃指鹿林謂其兄曰：「其室則邇，其人甚遠。」繇是朝貴絕於造請，唯與裴子野交好。天監末，累召不赴。天子以爲苟立虛名，以要顯譽，故二何孝緒並得遂其高焉。南平元襄謂曰：「昔君大父舉不以來游，取累吾弟，獨執其志，何也？」緒曰：「若麴廩盡可參馭，何以異乎？騶驥哉！鄱陽忠烈王其姊夫也。歲時之饋，一無所受。與劉著作同年，劉卒，緒曰：「吾其幾何？」

即辨後事數日而亡，壽五十八。孝緒博極群書，無一不善，精力強記，爲學者所宗。既卒，門人謚曰文貞處士。初，漢劉歆著七略，齊王儉著七志，孝緒普通四年著七錄。前五曰內篇，六曰佛法錄，七曰仙道錄。謂之外篇。劉歆七略則以道家爲諸子，以神仙爲方技。王儉七志則先道而後佛。孝緒七錄則先佛而後道，蓋所宗有不同，亦由其教有淺深也。○七錄內外圖書，總四萬四千五百二十六卷。凡天下之遺書秘記，盡於此矣。內佛法錄、經律論等五部，凡五千四百卷。至隋文帝仁壽間，嘉則殿書

古今
書籍
之數





皴裂然仁愛不斷親親及所近倖愆犯多縱捨坐是政刑弭紊每決死罪常矜哀流涕然後可奏性方正雖居小殿暗室常理衣冠小坐暑月未嘗褰袒雖見內豎小臣如遇嚴賓焉謚曰武皇帝廟號

高祖

出南史

梁武
史贊

史官魏徵曰高祖固天攸縱聰明稽古道亞生知學爲博物允文允武多藝多才爰自諸生不羈之度屬昏凶肆虐天倫及禍糾合義旅將雪家冤曰紂可伐不期而會龍躍樊漢電擊湘郢剪離德如振槁取獨夫如拾遺其雄才大略固不可得而稱

矣旣懸白旗之首方應皇天之眷而布澤施仁悅近來遠開蕩蕩之王道革靡靡之商俗大修文學盛飾禮容鼓扇玄風闡揚儒業介胄仁義折衝樽俎聲振寰區澤周遐裔干戈載戢凡數十年濟濟焉洋洋焉魏晉以來未有若斯之盛也然不能息末敦本斷雕爲樸慕名好事崇尚浮華抑揚孔墨流連釋老幾終夜不寐或日旰不食非弘道以利物唯飾智以驚愚且心未遺榮虛厠蒼頭之位高談脫屣終戀黃屋之尊夫人之大欲在乎飲食男女至於軒冕殿堂非有切身之急高祖屏除嗜欲

眷恋軒冕得其所難而滯其所易可謂神有所不達智有所不通矣

論曰魏鄭公論梁武帝可謂天下仁人之言也而新唐史蕭瑀傳贊亦曰梁蕭氏興江左實有功在民厥終無大惡以浸微而已故餘祉及其後裔以此驗鄭公之論益可詳矣然韓退之嘗曰梁武餓死臺城蓋謂其屏嗜欲絕午後食至臨終齋戒不衰在恣情豐羨享用者視之近乎餓死耳猶孔子稱伯夷寂齊餓死首陽其微意乃所以成其美焉豈謂不得食而餓死哉凡議

得失成敗如魏鄭公之言乃春秋責備賢者之旨得不為萬世之公道哉

庚午

簡文綱改大安字世讚小字亦通武帝第三子侯景破臺城立帝大安二年景又廢之

右東魏十六年而高洋篡之

北齊姓高氏五主都于鄴雷氏曰神武文襄文宣孝昭武成後主北齊

五帝二十九年

高祖神武帝歡字賀六渾渤海蓆人崩於晉陽葬漳水矣

文襄帝澄字子惠高祖長子為梁將所害壽二十九歲也

文宣帝洋字子進高祖次子承父祖位朝臣使受禪使中張亮謂孝靜曰五行

遠運有始有終願陛下遠法堯舜孝靜為容避遜而出齊王洋入即位降封孝靜為

中山王洋惡過禁紂復鳩靜帝在位十年改元天保壽三十一

沙門慧文禪師當齊高之世獨步河淮法門非世所知履地戴天莫知高厚閱中論發明論是龍樹所說故遙稟焉是為台宗二祖北齊尊者九祖傳

台宗二祖

辛未

侯景

懷朔鎮人初仕高歡為將擁兵十萬專制河南十三州歡死降梁祖後反攻梁

祖立簡是年弒簡自立稱漢改年太始登太極殿御床脚陷借立百日陳霸先殺之

壬申

元帝繹改承聖

字世誠小字七符武帝第七子初父夢僧眇一目執香爐云托生王

宮己而母夢月隨懷中後生帝也首封湘東王統義兵于江陵既臺城失守即位于江陵復命陳霸先王僧辨破侯景又為詩四絕西魏進士囊絨之壽四十七在位三年

西魏廢帝欽

文帝太子宇文泰立之雖在位而制由泰帝不勝憤欲除之泰

覺遂廢帝立恭帝即位二年不改号

世尊示滅一千五百年矣

承聖元年三藏真諦將歸天竺至廣州刺史歐陽

顏五

顏延之制止寺沙門慧愷等請譯起信俱舍等論

諦有氣宇風神爽邁顏之子統居別墅在河渚間

諦每訪統以坐具敷水面跏趺其上飄然往還坐

具略不露潤或不敷具即折荷葉而濟時好事多

圖畫而奉祀之荆山居士陸法和少隱江陵清溪

山服勤沙門執弟子禮及長出游語音巴楚容色

異常以操行絕等為梁湘東王所重爵以間散甚

諦折荷葉而濟居士陸法和傳

為諸公欽敬初侯景始降法和知其必叛以語朱
充英元英不了其意未久景圍京城元英求策和
曰取果宜待熟景遣將任約擊湘東主法和就乞
軍禦之對壘赤沙湖賊因風縱火燒廬法和以白
羽揮風風即返約軍大潰士卒求約不獲法和曰
洲際有水剝約在其下也可往擒之果得約抱剝
仰頭出鼻法和捨之謂王曰他日當得力約後果
立効法和所至江湖必立放生池切戒殺生湘東
主即位是為元帝以法和為郢州刺史始法和欲
大舉定魏帝不許法和笑曰吾嘗不希釋梵天王

坐處豈窺人王位耶但於空王佛所與王有因緣
如不能用則奈業何帝敗歸齊齊宣帝喜其來封
太尉賜甲第法和乞為佛寺身居偏室日手持香
爐行道禮佛燒香凝坐預期死日時至坐去尸縮
三尺許題壁曰十年天子為尚可百日天子急如
火周年天子逸代坐又曰二母生三天兩天共五
年指婁太后也人懼塗削之終不能去其神異如
此

承聖二年北齊高帝詔僧稠禪師稠將啓行而峯
巒振響飛走悲鳴如是者三日而止稠至京師降

詔禪授
綱師戒

帝今
罷講
習禪
綱諫
之

躡迎候命入宮授菩薩戒盡停五坊鷹犬及傷生之具禁境內屠殺稠留禁中四十日出居外寺尋有旨罷講席俾沙門盡習禪觀稠入諫帝以為弘通教理漸誘童蒙正賴講授願勿禁也從之及宣帝即位嘗謁稠稠牀坐不迎其徒有勸迎者稠曰昔賓頭盧尊者迎阿育王起行七步致王失國七年貧道雖寡德冀帝獲福耳俄以此被譖帝銜之將復入寺按其不敬誅之稠已知之及帝入寺預出十里許候之帝恠問稠曰恐身血汚伽藍故遠來就刃耳帝懼然悔謝謂其臣楊遵曰朕不明幾

妄黷聖師即奉之如故因從容啓帝曰陛下前身羅刹也今好殺蓋餘習耳帝問何以知之稠請以盆貯水自呪之命帝臨觀果自形正羅刹之狀仍有群羅刹隨之帝大驚自是絕葷終日坐禪禮佛行道如旋風焉

甲戌

敬帝方智

字惠相小字法真无第九子无被西魏破河陵殺之陳霸先殺王僧辨而立帝

即位以霸先為相進封陳王明年受禪帝十六歲終在位二年

西魏恭帝廓

文帝第四子字文恭以抑刺之言發歛立帝恭卒其子覺襲相

位進封周公時年十有五歲其叔宇文護逼帝禪位于覺封帝為宋公帝在政三年

乙亥

改紹泰

後梁姓蕭氏雷氏曰

宣嘗歸琛西魏附庸後梁三主三十四終

軍帝嘗

字理孫蘭陵人武帝孫昭明太子統第三子也宇文泰立之于江陵在位

八年改元大定壽四十四矣

北齊勅二教角試天保六年九月下詔勅諸沙門與道士達者十人親自對校于時金陵道士陸修靜等初為梁武所棄遂奔入魏至是頗盛而齊文帝復事佛靜等忌之詣闕請與釋子角法有旨令上統法師剋日較勝負至期大集公鄉脩靜等以術呪僧衣鉢及宮殿梁柱皆舉震動諸僧相顧缺然無對於是萬眾誼譁得以道流為勝修靜等雀

北齊曇顯與道士陸靜角試

躍魚視高自矜誇以已為神仙輩也又言沙門現一我即現二今以小術誘之耳帝顧謂上統曰佛門豈無人哉統曰方術小技儒俗鄙之况出家人也既承天命令拒可令寂下座僧對之于時有法師曇顯不知何許人居下位被酒昂兀而坐統令二人扶上高座登而笑曰向呪衣柱而飛動者我故開門試鄉術耳令取稠禪師衣鉢置地使呪之靜徒併力作法逾時不能動帝勅取衣一加十輩並不能舉顯即自取置諸梁上使呪梁柱亦不能動顯又曰我先醉耳有所聞云沙門現一我當現



狹故能寬能狹所成雖異能成常一帝曰善奉使稱旨既還文襄問政要弼曰天下大務莫過刑賞二端賞一人而天下喜罰一人而天下服二事得中自然盡善文襄悅曰言雖不多於理甚要

丙子

改太平○右西魏二十五年

而禪于宇文周

後齊

叙曰元魏將季其祚分崩肅宗孝明帝崇尚佛法胡木者親臨國政一紀之內天下晏然及帝崩太后死高歡誅賊爾朱榮於鄴燒洛陽宮室奉清河郡王立于鄴凡一十七載扶翼魏朝至太清三年

王述佛氏

武帝崩歡亦先殞卅子澄襲相王位未幾而殂魏靜帝乃孫位於高洋即歡之第三子也卅族武川仍都鄴下神用卓詭智愚混兼十餘年間教法中興僧至二百餘萬寺院凡四萬餘所六主相承二十有八年為周所滅齊書著作王劭述佛曰釋氏非管窺所及率爾妄言之又引列禦寇書述商太宰問孔子聖人事又黃帝游華胥氏之國華胥氏之國在佛游神而已此之所言髣髴於佛石符姚世經譯遂廣蓋欲柔伏人心故多寓言以方便不知是何神異浩蕩之甚乎其說人身心善惡卅事

因緣以慈悲喜捨常樂我淨書辨至精明如日月非正覺孰能證之允在順首莫不歸命達人則謹其身口修其定慧平等解脫究竟菩提及僻者為之不能通理徒務費竭財力功利煩濁猶六經皆有所失未之深也已矣

丁丑

右梁五十七年而禪于陳

後周宇文氏王木德雷氏曰太祖閔明武宣靜帝後周五主

二十五年

叙曰周之執祖宇文覺者即魏大丞相泰之世子也泰舉高陽王為帝遷都長安號西魏凡一十八

周惡
黑衣
廢釋

年廢帝更立齊王為帝四年而泰薨覺承魏禪當年被廢立弟毓為帝四年而殂乃立弟邕邕即周武帝也閱十餘年至建德初惑於道士張賓等妖言惡黑衣之讖除廢釋氏毀寺院四萬餘所僧三百萬悉令還俗洎滅齊未幾改元宣政五月而殂太子贇立自稱天元皇帝大象二年五月崩太子衍立明年二月禪位于隋周五主允二十五年國除初宇文泰及大冢宰宇文護並崇重佛法與西域三藏十餘人宣譯經論天文等凡百餘卷云

周太祖文皇帝小字黑獺郡代武川人其先出于炎帝之後炎為黃帝臧

子孫道居朔野有裔孫普回狩得玉璽三
紐文曰皇帝金回以為天授俗謂天文曰
字乃遂以國号宇文并
以為姓後廢齊即位焉


孝閔帝覺


小字暹羅尼文帝第三子泰卒帝受魏恭帝禪不改年号王木德在

位二年後為宇文護殺之壽十六歲葬於靜陵

比丘一清書

佛祖歷代通載卷第九





不 許 複 製

NOT TO BE REPRODUCED

東京大学東洋文化研究所